

04 APR 2002

UiTM-Gunung

25 PELAJAR UiTM MULA EKSPEDISI DAKI GUNUNG KALAPATTHAR DI NEPAL

IPOH, 4 April (Bernama) -- Sekumpulan 25 pelajar Universiti Teknologi Mara (UiTM), termasuk empat wanita, akan mengadakan ekspedisi mendaki Gunung Kalapatthar di Nepal setinggi 5,545m bermula 10 April ini.

Ketua ekspedisi dan Presiden Majlis Sukan Pelajar UiTM, Mohd Shujairi Mohd Ishak berkata, ekspedisi sebulan itu akan turut disertai dua orang pensyarah.

Katanya, mereka telah menjalani latihan selama hampir setahun, termasuk mendaki Gunung Tahan, sebagai persediaan menjayakan ekspedisi ke Gunung Kalapatthar, yang merupakan "base camp," sebelum pendakian ke Gunung Everest, gunung tertinggi di dunia.

"Kami juga bercadang mengibarkan Jalur Gemilang sepanjang 4,000m dalam bentuk M di puncak gunung itu yang menandakan Malaysia, Mahathir (Perdana Menteri) dan Mara," katanya kepada pemberita selepas menerima sumbangan RM40,000 daripada Kerajaan Negeri Perak, di sini, hari ini.

Sumbangan itu disampaikan oleh Menteri Besar, Datuk Seri Tajol Rosli Ghazali.

Mohd Shujairi berkata, idea untuk mendaki Gunung Kalapatthar timbul hasil galakan seorang pensyarah UiTM, Fauzan Hassan yang merupakan salah seorang anggota ekspedisi mendaki Gunung Everest pada tahun 1997.

Katanya, seramai 500 pelajar UiTM memohon menyertai ekspedisi itu dan mereka yang berjaya telah memenuhi beberapa kriteria seperti cergas dan CGPA (Purata Mata keseluruhan) melebihi 2.5.

Mohd Shujairi berkata, mereka memerlukan RM219,000 sebagai kos keseluruhan projek itu dan kini pihaknya telah berjaya mengutip RM150,000.

"Semasa di Nepal, kami akan mendapatkan khidmat seorang sherpa (pemandu pendakian), tiga porter dan tiga ekor yak," katanya.

Beliau berkata, terdapat tujuh pusat pemeriksaan sebelum sampai ke puncak gunung itu dan mereka akan bermalam selama dua hari di setiap satunya untuk aklimatasi.

Anggota kumpulan ekspedisi yang berumur di antara 20 hingga 25 tahun ini merupakan pelapis kepada ekspedisi mendaki Gunung Everest yang dijangka akan diadakan pada tahun 2004, katanya.

-- BERNAMA

AR ZB